

224

418

8

準
貴



遺山先生詩集卷第十六

七言絕句


山居二首

斜陽高樹挂晴虹
肅肅微涼雨氣中
一道鷺鷥花不斷
密香吹滿馬頭風

詩腸搜苦怯茶甌
信手拈書却枕頭
簷溜滴殘山院靜
碧花紅穗媚涼秋

寄女嚴三首

鶴崖魚窟路間關
旬月無絲一往還
寒食歸寧見



鄰女舉家迴首望西山

鶴崖魚窟在內
鄉往盧氏道中

添丁學語巧於絃詩句無人爲口傳竹馬幾時迎

阿姊五更教誦木蘭篇

眼前兒女最關情不見經年百感并聞道全家解
禪理擬從香火問無生

自鄧州幕府暫歸秋林

升斗微官不療飢中林春雨蕨芽肥歸來應被青
山笑可惜緇塵染素衣

無題二首

七十鴛鴦五十絃酒薰花柳動春煙人間只道貴
金貴不問天公買少年

春風也解惜多才嫁與桃花不問媒死恨天台老
劉阮人間何戀却歸來

題省掾劉德潤家驂鸞圖并爲同舍郎劉長
卿記異劉在方城先有碧簫之遇如芙蓉

城事云

千秋情緣萬古期樓中簫史姓名非洞天花落秋
雲冷腸斷青鸞獨自飛

希顏挽詩五首

官銜寥落在銘旌十命寧論重與輕不作漢家賢

傳去空勞明主識蕭生

溘焉溘溘漠旌紀寂寞
魏書中隱逸傳語

山立揚休七尺身紫髯落落照青春從教不入麒麟

畫猶是中朝第一人

人間無路問天公自古才難更厄窮日月不爲千

載計江山長惜萬夫雄

萬古文章有正傳驂駟爭道望君先傷心一入重

泉後再得斯人又幾年

一世龍門屬李膺待君提拂遂騰升千年荆棘龜

趺在會有人尋下馬陵

出鄧州

本無奇骨負功名取次誰教髀肉生未到白頭能

幾日六年畱滯鄧州城

過希顏故居四首

缺壺聲裏短歌行星斗闌干醉膽橫虎視鷹揚何

處在道邊孤塚可憐生

鶴蓋成陰著處同一時人物酒杯中臣門如市心

如水世俗論量恐未公

暮去朝來萬化途飛揚跋扈亦區區劇談不盡平
生意能有精微入夢無

把臂論交分最深三夫成虎古猶今百年唯有區
區在地下纔應識此心

雜著九首

萬期流轉不須臾物物觀來定有無玉席紙衣全
一盡枉將白骨計榮枯

鳧短何如鶴有餘非魚誰謂子知魚一枝莫作鷓

鷓看水擊三千不羨渠

太虛空裏一遊塵造物雖工未易貧臧獲古來多
鼎食可能夷叔是飢人

青葢朝來帝座新豈知衛瓘是忠臣洛陽荆棘千
年後愁絕銅駝陌上人

六國孱王走下風神人鞭血海波紅無端一片云
亭石殺盡蒼生有底功

天上河源地上流黃金浮世等閒休埋愁不著重
泉底儘向人間種白頭

泗水龍歸海縣空
朱三王八竟言功
圍碁局上豬奴戲
可是乾坤鬪兩雄

昨日東周今日秦
咸陽煙火洛陽塵
百年蟻穴蜂衙裏
笑煞崑崙頂上人

半紙虛名百戰身
轉頭高塚臥麒麟
山間曾見漁樵說
辛苦凌煙閣上人

戚夫人

鴻鵠冥冥四海飛
戚夫人舞淚霑衣
無端恨殺商山老
剛出山來管是非

題山谷小豔詩

法秀無端會熟謾
笑談真作勸淫看
只消一句修脩利
李下何妨也整冠

家山歸夢圖三首

別却并州已六年
眼中歸路直於弦
春晴門巷桑榆綠
猶記騎驢掠社錢

繫舟南北暮雲平
落日滹河一線明
萬里秋風吹布袖
清輝亭上倚新晴

游騎北來塵滿城
月明空照漢家營
卷中正有家

山在一片傷心畫不成

四皓圖

身墮安車厚幣中
白頭塵土宛西風
當時且不山間老
羽翼區區有底功

雜著

老優慣著沐猴冠
却笑傍人被眼謾
造物若畱殘喘在我
儂試舞你儂看

俳體雪香亭雜詠一十五首

亭在故汴宮
仁安殿西

滄海橫流萬國魚
茫茫神理竟何如
六經管得書

生下闊劍長槍不信渠

洛陽城闕變灰煙
暮號朝虞只眼前
爲向杏梁雙

燕道營巢何處過明年

落日青山一片愁
大河東注不還流
若爲長得熙

春在時上高層望宋州

醇和旁近洞房環
碧瓦參差竹樹間
批奏內人輪

上直去年名姓在窗間

醇和殿名

天上三郎玉不如
手中白羽趁花奴
御屏零落宣

和筆畱得華清按樂圖

詩仙詩鬼不謾欺時事先教夢裏知禁苑又經人
物散荒涼臺榭水流遲

廿年前商仲國器方城夢
中得後二句爲言如此

金縷歌詞金曲卮百年人事鬢成絲重來未必春
風在更爲梨花住少時

楊柳隨風散綠絲桃花臨水弄妍姿無端種下青
青竹恰到湘君淚盡時

琵琶心事曲中論曾笑明妃負漢恩明日天山山
下路不須迴首望都門

爐薰浥浥帶輕陰翠竹高梧水殿深去去旃車雪

三尺畫羅休縷麝香金

泥金色如麝
香宮中所尚

羅綺深宮二十年更持桃李向誰妍人生只合梁
園死金水河頭好墓田

苦才多思是春風偏近騷人悵望中啼盡杜鵑枝
上血海棠明日更應紅

暖日晴雲錦樹新風吹雨打旋成塵宮園深閉無
人到自在流鶯哭暮春

萬戶千門盡有名眼中歷歷記經行賦家正有蕪
城筆一段傷心畫不成

暮雲樓閣古今情地老天荒恨未平白髮纍臣幾
人在就中愁殺庾蘭成

春夕

數枝殘雪梅仍在幾日東風柳已嬌春酒價高無
可典小紅燈影莫相撩

梅花

一樹寒梅古寺邊荒山老木動春妍東家賴有詩
人在照影橫枝莫自憐

溪上

短布單衣一幅巾暫來閒處避紅塵低昂自有水
中影好箇山間林下人

息軒楊祕監雪行圖

長路單衣怨僕僮無人說向息軒翁長安多少貂
裘客偏畫書生著雪中

楊煥然生子四首

掌上明珠慰老懷愁顏我亦爲君開異時載酒揚
雄宅知有迎門竹馬來

人家歡喜是生兒巷語街談總入詩我欲去爲湯

餅客買羊沽酒約何時

半生辛苦坐耽書我笑先生老更迂生子但持門

戶了玄談何必似童烏

阿麟學語語牙牙七歲元郎髻已丫更醉使君湯

餅局兒曹他日記通家

阿麟張君美兒子

記夢

天上材官老不材從教兀兀走塵埃夢中望拜通

明殿曾見金書兩字來

戊子七月二十四日內鄉往盧氏宿走馬平夜夢拜

大帝像遂觀法駕導引畫幄最前負弩三人中有金書小字題裕之者夢中不自知其為子也

啟母石

書載塗山世共知誰傳頑石使人疑可憐少室老

突兀也被人呼作阿姨

雜著四首

白髮劉郎老更癡人間那有後天期茂陵石馬專

相待種下蟠桃屬阿誰

白髮中官解道詩殷勤仍為憺花枝雪香亭上清

明宴記得君王去歲時

六朝瓊樹掌中春迴首胡妝一面新生羨石家金

谷裏千年獨有墜樓人
燕語鶯啼百轉新長廊寂寂不逢人東君去作誰
家客花柳無情各自春

內鄉雜詩

行吟溪北復溪南風日烘人酒易酣無限春愁與
誰語梅花嬌小杏花憨

脣二首

香墨燒殘水口口口麝塵內家新樣入輕勻郭熙只爲吳
山老爭信窗間口口有小顰

石綠香煤口口淺淡間多情長帶楚梅酸小詩擬寫春
愁樣憶著分明下筆難

送窮

煎餅虛拋塩散堆滿城都道送窮迴不如畱取窮
新婦貴女何曾喚得來

三鄉時作

山林鍾鼎不相兼說著浮名夢亦嫌菽水盡歡吾
豈敢老親自愛薺羹甜

出都

春閨斜月曉聞鶯信馬都門半醉醒官柳青青莫
回首短長亭是斷腸亭

癸巳五月三日北渡三首

道傍僵臥滿纍囚過去旃車似水流紅粉哭隨回
鶻馬為誰一步一回頭

隨營木佛賤於柴大樂編鐘滿市排虜掠幾何君
莫問大船渾載汴京來

白骨縱橫似亂麻幾年桑梓變龍沙只知河朔生
靈盡破屋疎煙却數家

桑梓其剪為龍沙平郭璞語

登珂山寺三首

澹澹長空白鳥迴江山都入妙高臺六鼇只解翻
溟渤不駕東南日觀來

太山在東南而此山之不見

悠悠誰了未生前一落泥塗又幾年堪笑長清郭
明府再來仍被葛藤纏

長清郭明府自省夙世是此寺比丘及作寺碑宛然

算沙語也

白日紅塵往復還深居那得似禪關出門應被山
僧笑纔得雲林半日閒

夢中作

夢人請賦四禽語其一泥滑滑也

春泥滑滑滿春山
慚媿幽禽喚客還
安得便乘雙翼去
綠陰清晝伴君閒

奉酬子京禪師見贈之什二首

南風穩送北歸船
畱得虛明一指禪
崧少詩僧幾人在
因君迴望一悽然

舊遊重憶故人詩
一點青燈兩鬢絲
不似戒壇明

月夜杏花香裏唱歌時

往在崧山時陪馮內翰雷御史游戒壇詩中所道蓋

當時事也

杏花

桃李前頭一樹春
絳唇深注蠟猶新
只嫌憨笑無人管
鬧簇枯枝不肯勻

聊城寒食

輕陰何負探花期
白髮於春自不宜
城外杏園人去盡
煮茶聲裏獨支頤

姨母隴西君諱日作三首

竹馬青衫小小郎
阿姨懷袖阿孃香
一龕白骨黃河隔
遙望井門哭斷腸

病起拈針眼未花
團圓兒女運司衙
今年得在應

猶健更好從頭說外家

寶鏡煌煌照九州埋藏曾及見諸劉鄴城今日無

雷煥紫氣誰當辨斗牛

陽曲劉氏家大寶鏡能照天地四方以前知休咎其

家埋地中人不得見也明昌泰和中北方兵動渠父子欲卜之一日先以旃幕障中庭乃高閉門戶甚嚴及掘鏡出光耀爛然一室盡明如初日之照鏡中見北來兵騎穰穰無數餘三方都無所覩因大駭曰不可不可即埋之姨母時伏牀下得竊窺焉兵火後此家唯一兒子在姨母能指鏡處存否則不知也故予詩及之

宿神霄北菴夢中作

素月空流散紫煙座中人物半神仙麗川往事渾

如夢信手題詩一泫然

夜雪

三更殘醉未全醒夢裏嬌兒索乳聲茅屋不知門外雪黃紬衾煖紙窗明

冠氏趙庄賦杏花四首

一樹生紅錦不如乳兒粉抹紫襜褕花中誰有張萱筆畫作宮池百子圖

文杏堂前千樹紅雲舒霞卷漲春風荒村此日腸堪斷迴首梁園是夢中

錦樹烘春爛不收看花人自爲花愁
荒蹊明日知誰到憑仗詩翁爲少畱

東風誰道太狂生次第開花却有情
聞道紀園千樹錦一尊猶及醉清明

自趙庄歸冠氏二首

春華澹澹曉寒輕野草搖風半白青
誰識杏花牆外客舊曾家近麗川亭

杏園紅過雪披離楊柳無風綠線齊
寒食人家在原野乳鴉牆外盡情啼

戲贈白髮二首

鏡中昨日又明朝破屋春深雪未消
摘下數莖聊自笑貴人頭上不相饒

問愁何怨復何讐直要青春便白頭
拚却鏡中渾似雪且看渠待幾時休

戲題醉仙人圖

醉鄉初不限東西桀日湯年一理齊
門外山禽喚沽酒胡蘆今後大家提

提胡蘆沽美酒禽語也

遺山先生詩集卷第十七

七言絕句

濟南雜詩十首

兒時曾過濟南城
暗算存亾只自驚
四十二年彈指過
只疑行處是前生

匡山聞有讀書堂
行過山前笑一場
可惜世間無李白
今人多少賀知章

華山真是碧芙蓉
湖水湖光玉不如
六月行人汗如雨
西城橋下見游魚

吳兒洲渚似神仙
罨畫溪光碧玉泉
別有洞天君不見
鵲山寒食泰和年

石刻燒殘讌集辭
雄樓傑觀想當時
只應画戟清香地
多欠韋郎五字詩

斫來官樹午陰輕
湖畔遊人怕晚晴
一夜靈泉菴上宿
四山風露覺秋生

白煙消盡暎雲凝
山月飛來夜氣澄
且向波間看玉塔
不須橋畔覓金繩

入秋雲物便淒迷
一道湖光樹影齊
詩在鵲山煙

雨裏王家圖上舊
曾題

王清卿家有
鵲山煙雨圖

荷葉荷花爛熳秋
鷺鷥飛近釣魚舟
北城佳處經行徧
畱著南山更一游

看山看水自繇身
著處題詩發興新
日日扁舟藕花裏
有心長作濟南人

題解飛卿山水卷

平生魚鳥最相親
夢寐煙霞卜四隣
美殺濟南山水好
幾時真作卷中人

趙士表山林暮雪圖爲高良卿賦二首

颼颼林響四山風雪後人家閉戶中應被火爐頭
上說水邊清殺兩詩翁

黃塵遮斷山間夢白髮重尋画裏詩好似玉溪溪
上路醉和王老喚船時

倫鎮道中見槐花

名場奔走競官榮一紙除書悞半生笑向槐花問
前事爲君忙了竟何成

題劉才卿湖石扇頭

幽磴雲凝雨未乾曲池疎竹共荒寒扇頭喚起西

園夢好似熙春閣下看

聞歌懷京師舊遊

樓前誰唱綠腰催千里梁園首重迴記得杜家亭
子上信之欽用共聽來

鄭先覺幽禽照水扇頭

臨水華枝淡淡春水光華影兩無塵風流一枕西
園夢惆悵幽禽是故人

龍泉寺四首

懸麻白雨映層崖過盡行雲晚照開可是登臨動

高興馬頭新自太行來

泉石煙霞自一家殘僧隨分了生涯鷄鳴山下題
詩客曾到靈巖不用誇

河邊殺癩尚能飛無角無鱗自一齊甲子紛紛更

兒戲壁間休笑阜昌題

寺北齊時建又多劉豫
阜昌中石刻并題名

遶渠寒澗夜潺潺說有蛟龍在石間可惜九天霖
雨手一泓泉水伴僧閒

李進之迂軒二首

白髮歸來世事新書生風味是清貧歛歛歷落從

人笑潦倒羸疎我自真

舉世營營共一途要來閒處費工夫入門且莫分

賓主不但君迂我更迂

出鎮州

汾水歸心日夜流孤雲飛處是松楸無端行近還
鄉路却傍西山入相州

過邯鄲四絕

富貴榮華一嘆嗟依然夢裏說韶華千年幾度山
河改空指遺臺是趙家

人事存亡不易知及時娛樂恨君遲後人共指叢
臺笑三尺堯堊竟屬誰

川原落落曙光開四顧河山亦壯哉前日少年今
白髮只應孤塔記曾來

死去生來不一身定知誰妄復誰真邯鄲今日題
詩客猶是黃梁夢裏人

楊祕監馬圖

大青小青天馬姿楊侯房星非画師忽見奚官記
前事東華馳道晚涼時

竹溪夢遊圖

意外荒寒下筆親經營慘淡似詩人何時萬頃風
煙裏白髮刁騷一幅巾

藥正卿餉酒

宿醒未解渴生塵驚見王弘餉酒人獨恨文書困
佳客不來同醉五更春

王都尉山水

平林漠漠數峰閒詩在岩姿隱顯閒自是秦樓画
眉手不能辛苦作荆關

贈絕藝杜生

迢迢離思入哀絃非撥非彈有別傳解作江南斷
腸曲新聲休數李龜年

趙大年秋溪戲鴨二首

寒沙折葦浙江灣詩在波痕滅沒間前日扁舟人
老矣却從圖画美君閒

画家朱粉不到處淡墨自覺天機深賣酒壚邊見

崔白王孫真有五湖心

米元章画史趙昌王友崔白但可爲酒家遊墻壁耳

自題二首

共笑詩人太瘦生誰從慘淡得經營千秋萬古迴

文錦只許蘇娘讀得成

千首新詩百首文藜羹不糝日欣欣鏡中自照心
語口後世何須楊子雲

北埽經朝歌感寓三首

南來山勢漸坡陀蕩蕩川涂接大河馬上哦詩無
好語聊從白塔記朝歌

黃屋何曾土作階禍基休指九層臺書生不見千
秋後枉爲君王泣玉杯

墨翟區區不近情迴車曾此避虛名采薇唯有西山老不逐時人信武成

內黃道中楚王廟荆公有誰合軍中稱亞父却須推讓內黃兒之句因為范增解嘲

一怒屠城一說畱書生剛為范增羞軍中老子關何事付與兒曹調沐猴

題蘇氏寶章

二老風流有典刑諸郎蘭玉映階庭峨眉寶氣千年在未數陳家聚德星

長公忠義似顏平原次公仲澹似林西湖故字畫有

不期合而合者最後數帖所謂蘇氏三虎叔黨為最怒耳

劉氏明遠菴三首

豪氣元龍百尺樓功名場上早抽頭路人不識閒居士袖手雍容活兩州

世上無物礙虛空宴坐經行一體同老眼不應隨境轉江山元只在胸中

落落雲間晚照開上方別有妙高臺栽花種柳明年了拄杖敲門日日來

題李庭訓所藏雅集圖二首

萬古文章有至公百年奎壁照河東衣冠忽見明
昌筆更覺升平是夢中

景星丹鳳一千季合著丹青與世傳誰畫風流王
李郝大河南望淚如川

王謂仲澤李謂長源郝謂仲純

南關二首

風裏秋蓬不自繇一生幾度過隆州無情團柏關
前水流盡朱顏到白頭

路轉川迴失繫舟更教兩驛過徐溝多情團柏關

前水卻共清汾一處流

是日自徐溝宿南關

馬坊冷天師清真道院三首

水際茅齋星散居白雲閒伴五溪魚茂林修竹山
如畫蘸碧軒中恐不如

枯蒲折葦障清灣十里風荷指顧間安得西湖展
江手亂鋪雲錦浸青山

靜中入境兩翛然我亦因君有靜緣已約青山來
枕上水亭風榭看明年

惠崇獐猿圖

月嘯煙呼本不群筆頭同是一溪雲野情山態令

人羨世路機關不似君

寄史同年二首

清話通宵慰別離
殷勤釀酒趁花期
沁南只道梅花早
猶較歸程十日遲

相君許送買山錢
晚歲隣居定有緣
一樹梅花一尊酒
知君東望亦悽然

宋周臣生子三首

試手君家助喜詩
秋風丹桂長新枝
昂霄聳壑他年見
木月同宮記此時

木月同宮五星家謂人以此時生者長必貴

玉季金昆世共賢
天將文筆付家傳
清新未要梅

花賦射虎畱看第二篇

鄉先生宋濟川以射虎詩著名

雛鳳來時鶴卵成
兩兒前後不多爭
阿寧解語應須道
猶是渠家百日兒

乞酒示皇甫季貞

醉頭慵舉睡昏昏
夢裏青旗雪擁門
枕上一杯風味好
糟牀何處得茶渾

李白騎驢圖

八表神游下筆難
畫師胸次自酸寒
風流五鳳樓

前客枉作襄陽雪裏看

許由擲瓢圖

不知黃屋不知堯喧寂何心計一瓢我是許由初
不爾只將盛酒杖頭挑

九月晦日

松楸千里動悲哀說道迴家早晚迴九月忽驚今
日盡滿城風散紙錢灰

雜著

燒殘芻狗不能神一色貂裘繡帽新好箇路傍官

堠子經年端坐看行人

送窮

送君君去欲何之暫去還來也不辭但媿苦無相
贈物柳船輕似去年時

卽事

四長東州貢姓名阿茶能誦木蘭行元家近日添
新喜掌上寧兒玉刻成

寧兒叔開小字阿茶第四女字叔開

侯相公所藏雲溪圖曾命賦詩三首但記其

一云祖道東門未有涯田君方駕入宮車

祇應千古狼溪路人說山中宰相家相公
以體重不任步趨詔許駕小車至朝殿外
門故予詩及之北渡後往東平路經雲溪
因爲之賦

黃山圖子翰林詩千里東州有所思前日相公門
下客國亡家破獨來時

陳德元竹石二首

一片春雲雨未乾兩枝新綠倚高寒瘦龍不見金
書字試就宣和石譜看

萬石綱船出太湖九州膏血一時枯阿誰種下中
原禍猶自昂藏入畫圖

同漕司諸人賦紅梨花二首

梨花曾比太真妃別有風流一段奇白雪爲肌玉
爲骨淡妝濃抹總相宜

瓊枝玉蘂靜年芳知是何人與點妝可道海棠羞
欲死能紅能白更能香

吳子賢樗菴二首

人道樗形百醜全我知道造物向君偏世間正有明

堂柱偃蹇風霜得幾年

廣莫初無匠石過一丘一壑奈君何世間正有明

堂柱春草輸羸狡幾多

太乙蓮舟圖三首為濟源奉先老師賦

老師
吾宗

盟

泠泠風外列僊臞琢玉羊欣定不如六合空明一

蓮葉更須遮眼要文書

仙人在蓮
葉臥看書

僊人寧得此婆娑亡奈丹青狡猾何我與太虛同

一體也無蓮葉也無波

太乙青藜出漢年明牕開卷一欣然憑君莫問題

詩客不是韓駒第二篇

遊天壇雜詩十三首

芳樹陰陰鳥語譁綠雲晴雪映紅霞青山可是堪

人恨藏著中岩十里花

漫山白白與紅紅小樹佞藁看不供總道植花香

氣好就中偏愛玉瓏鬆

花名有
玉瓏鬆

只願長城沒徹頭豈知蒸土更堪憂秦人若見千

年後抱杵臨洮老死休

避秦
講

溪童相對采椿芽指似陽坡說種瓜想是近山營
馬少青林深處有人家

仙貓聲在洞中聞憑仗兒童一問君同向燕家舐

丹鼎不隨鷄犬上青雲

仙貓洞是日兒子叔儀呼貓應者土人傳燕家鷄犬

升天貓獨不去

諸峯羅列擁朝臺落日行雲一望開絕似太山山

上看分明齊嶺是徂徠

空翠霏煙海浪深鼇頭鵬背半浮沉不知脚底山

多少還盡平生未足心

湍聲洶洶落懸崖見說蛟龍擘石開安得天瓢一

翻倒躡雲平下看風雲

時早甚故云

僊壇倒影鳳麟洲一道雲光插素秋也是天公閒

不得海東移著海西頭

道民終不忘天台姓字依然在蜜崖為問松臺千

歲鶴白雲何處不歸來

近歲盧氏蜜崖人迹不及處有題字云道民天台司

馬承禎過松臺即白雲老葬地

僊人龍躡玉為鞭石穴留書世不傳弱水蓬萊三

萬里青山今古幾何年

近年人有得司馬先生石穴所藏丹經子獲觀于山

風期身後復身前一讀丹華似有緣八表神遊吾
豈敢或能搖筆賦垂天

擬著茅齋北斗平殘年細讀洗心經詩成應被盧

仝笑曾見青山養伯齡

盧仝送伯齡出山云伯齡不厭山山不養伯齡予以

早當出山故自戲云北斗平在天壇之後

初發潞州

潞州住久似并州身去心留不自繇白塔亭亭三
十里漳河東畔幾迴頭

雜詩六首道中作

鼠肝蟲臂復何辭坎止流行亦有時已被吳中喚
僮父却來河朔作炎兒

隆州兵騎往來衝客路灰郊更向東大似天教浣
塵土數程都在水聲中

懸崖飛瀑駭初經白玉雙龍擊迅霆却恨暑天行
過速不曾赤脚踏清冷

黃華北下馬陵南佛屋燒殘有石龕想是故鄉行
欲近粥糜渾覺水泉甘

莊休通蔽玄相妨鄉社情親豈易忘司命果能還
舊觀髑髏端合羨侯王

鄉關白日照青天徒步歸來亦可憐袖裏新詩一
千首不愁錦繡裹山川



遺山先生詩集

第十七

終



